

ZAKLJUČCI USMJERENI KA SVEOBUHVAATNOJ BORBI PROTIV NASILJA

1. Zahtijeva se hitno utvrđivanje eventualne odgovornosti policijskih službenika i nosilaca pravosudnih funkcija, kao i adekvatno sankcioniranje u slučajevima eventualno utvrđenih propusta i krivične odgovornosti navedenih lica, te blagovremeno izvještavanje javnosti o poduzetim radnjama i postignutim rezultatima u slučaju tragičnih događaja u gradu Gradačac, kao i svim sličnim slučajevima prisutnog nasilja.
2. Pozivaju se nadležni subjekti da povećaju kapacitete sigurnih kuća za žrtve nasilja/korisnike sigurnih kuća, te da se pristupi njihovoj izgradnji na područjima na kojima ih nema, kao što je slučaj sa gradom Gradačac.
3. Traži se od nadležnih organa i institucija da u sigurnim kućama, pored fizičke zaštite, korisnicima istih osiguraju neophodnu psihološku podršku, pravnu pomoć, kao i zbrinjavanje obrazovnog procesa djeteta.
4. Pružiti institucionalnu podršku kroz sistem socijalne zaštite koja treba biti adekvatna i uvezana sa nadležnim organima.
5. Traži se da nadležni zakonodavni organi promptno pristupe donošenju propisa kojima će se efikasno kontrolirati objave svih vrsta i oblika sadržaja koji promoviraju ili podstiču nasilje.
6. Pozivaju se i ohrabruju žrtve nasilja, kao i sva lica koja raspolažu informacijama o nasilju, da iskažu visok stepen odgovornosti i bez odlaganja izvrše prijavu uočenog nasilja, te na taj način spriječe eskalaciju sa tragičnim ishodom.
7. Pozivaju se nadležne vlade, ministarstva i drugi relevantni subjekti da osiguraju efikasnu zaštitu žrtava nasilja, prevashodno u smislu interventnog djelovanja po podnesenim prijavama, kao i da obezbijede adekvatnu zaštitu prijavitelja nasilja.
8. Pozivaju se nadležne vlade, ministarstva i drugi relevantni subjekti da izvršioci težih krivičnih djela stave pod poseban, efikasan i redovan nadzor policijskih organa, i to nakon odsluženja dosuđene kazne, kao i da se zakonom definiše odgovornost policijskih službenika u slučajevima propuštanja poduzimanja službene radnje.
9. Ukazuje se na potrebu saradnje sa policijskim organima, a nadležni organi i institucije se pozivaju da organizuju posebne treninge za policijske agencije i službenike o načinu pristupa žrtvama rodno zasnovanog nasilja i nasilja u porodici.
10. Traži se drastično stroži pristup u slučajevima ponavljanja ili eskalacije nasilja, te intenzivan rad na pravovremenoj procjeni rizika, kao i pozivanje na odgovornost i sankcioniranje policijskih službenika u slučajevima neadekvatnog reagovanja na slučaj nasilja.
11. Femicid definirati kao posebno krivično djelo donošenjem adekvatnih propisa ili izmjenama i dopunama važećih propisa (Krivičnog zakona BiH i drugih propisa), i to na način da se ovo djelo propiše kao poseban oblik ubistva i u tom smislu integriše njegovo prepoznavanje kao posebnog zločina u sudskim praksama u BiH.
12. Traži se rigoroznije i oštrije procesuiranje slučajeva nasilja nad ženama, a za krivična djela rodno zasnovanog nasilja, nasilja u porodici i femicida, pooštavanje sankcija kroz dugoročnije zatvorske kazne.
13. Apeluje se na obrazovne i vjerske ustanove da preuzmu svoj dio odgovornosti i posebnu pažnju posvete edukaciji mladih u smislu promocije nenasilja u porodici i široj zajednici.
14. Pozivaju se nadležni organi da hitno poduzmu aktivnosti u cilju proširenja zatvorskih kapaciteta, a sve u cilju da se omogući da izvršioci krivičnih djela, po izricanju

osuđujuće zatvorske kazne, odmah stupe na izdržavanje iste, te da se na taj način spriječi nerijetko prisutna praksa da izvršioци krivičnih djela uslijed nedostatka zatvorskih kapaciteta, zatvorske kazne odsluže tek protekom određenog vremena ili ih uopće ne odsluže.

15. Apeluje se na nadležne subjekte da efikasno prate i reaguju na medijsko izvještavanje koje kroz svoje sadržaje podstiče i promovise nasilje i izvršioce krivičnih djela.
16. Traži se od nadležnih organa da istraže i sankcionišu širenje i podržavanje svih vrsta i oblika nasilnog sadržaja na društvenim mrežama, kao i reakcija i djelovanje Vijeća za štampu BiH u slučajevima neadekvatnog medijskog izvještavanja o nasilju nad ženama, a koje dehumanizira žene.
17. Traže se javne kampanje prevencije rodno zasnovanog nasilja, nasilja u porodici i femicida, kao i korektno i profesionalno medijsko izvještavanje o slučajevima nasilja nad ženama i femicida.
18. Traži se sprovođenje Međunarodnopravnih obaveza u smislu sveobuhvatne implementacije i poduzimanja mjera iz Istanbulske konvencije i Konvencije Vijeća Evrope o sprječavanju i borbi protiv nasilja nad ženama i nasilja u porodici.
19. Konstatuje se da je prisutno stanje u vezi sa svim oblicima nasilja rezultat zanemarivanja žrtava nasilja i višedecenijske zapuštenosti ove problematike, te da je posljednji trenutak da se pristupi donošenju i uspostavljanju adekvatnih mjera, jer oni koji su odgovorni, a tolerišu ovakvo stanje postaju saučesnici u vršenju nasilja.
20. Ovaj Zaključak će biti dostavljen nadležnim organima i institucijama u čijoj nadležnosti je postupanje po istom i bit će prezentovan na službenoj web stanici Grada Sarajeva.